

Tomislav Krzyk^{*)}

OBILJEŽILI SMO 110 GODINA KATASTRA ZEMLJIŠTA

U 1996. godini navršilo se 110 godina od postojanja katastra i zemljišne knjige u Bosni i Hercegovini. Ovako značajan jubilej trebalo je dostojno obilježiti.

Stoga su Uprava za geodetske i imovinsko-pravne poslove Bosne i Hercegovine i Predsjedništvo Saveza udruženja građana geodetske struke na zajedničkoj sjednici održanoj 16.01.1996.g. imenovali Odbor za obilježavanje 110 godina katastra u Bosni i Hercegovini. Za predsjednika Odbora imenovan je predsjednik Saveza Mustafa Begić, dipl.pravnik i geod.inž. Odbor čine Komisija za organizaciju i Komisija za izložbu. U komisiju za organizaciju imenovani su mr Mirsad Bakšić (predsjednik), Fehim Behlilović, Prof.dr Faruk Selesković, Šućrija Sarić, Mustafa Guso i Tomislav Krzyk. U Komisiju za izložbu imenovani su Šukrija Gavranović (predsjednik), Subhija Kuljuh, Hakija Abaza, Dervo Subašić, Himzo Drakovac i Muharem Balta.

Zadatak Odbora bio je da organizuje obilježavanje 110 godina katastra u Bosni i Hercegovini sa prigodnim stručnim referatom, izložbom i dodjelom priznanja zaslužnim institucijama i pojedincima.

Nakon obimnih aktivnosti, pri čemu je bilo dosta teškoća, Odbor je uspio izvršiti sve pripreme, tako da je obilježavanje jubileja održano u Sarajevu od 4. do 10. decembra u Galeriji "MAK".

Jubilej je svojim prisustvom uveličalo oko 150 geodetskih stručnjaka iz Federacije Bosne i Hercegovine.

Svečanost je u ime Vlade Bosne i Hercegovine otvorio mr Hilmo Pašić, ministar pravde i opštih poslova. Referat "110 godina katastra zemljišta u Bosni i Hercegovini" sa odgovarajućim podacima i istorijatu podnio je Mustafa Begić, direktor Uprave za geodetske i imovinsko-pravne poslove Bosne i Hercegovine.

U ime Geodetske službe Republike Austrije prisutnima se obratio gospodin Gunter Schuster. On je prisutne pozdravio, čestitao na postignutim rezultatima i istakao povezanost geodetskih djelatnosti Republike Austrije i Bosne i Hercegovine. Uslijedili su pozdravi predstavnika geodetskih djelatnosti iz Bosne i Hercegovine.

U znak priznanja institucijama i pojedincima zaslužnim za uspostavu i održavanje katastra zemljišta, te školovanje geodetskog kadra, Uprava za geodetske i imovinsko-pravne poslove Bosne i Hercegovine dodijelila je priznanja u vidu povelja i plaketa: Geodetskoj službi Republike Austrije, Geodetskom odsjeku Građevinskog

^{*)} Tomislav Krzyk, dipl.inž.geod., Uprava za geodetske i imovinsko-pravne poslove Bosne i Hercegovine, Sarajevo

fakulteta u Sarajevu, Upravi za geodetske i imovinsko-pravne poslove Bosne i Hercegovine, Geodetskom zavodu Bosne i Hercegovine, Geodetskom fakultetu u Zagrebu, Geodetskoj tehničkoj školi u Sarajevu, te zaslužnim pojedincima, doajenima geodetske djelatnosti i Bosni i Hercegovini: prof. Ismetu Aganoviću, prof.dr Abdulahu Muminagiću, Salihu Kabilu, direktoru Republičke geodetske uprave u penziji, Mili Glavašu Fehimu Behliloviću, Romanu Majeru, Dautu Filipoviću i Salihu Bešlagiću.



Ovom prigodom, otvorena je izložba arhivskih eksponata, originalnih podataka premjera i pravnih propisa iz oblasti katastra zemljišta i zemljišne knjige, te geodetskih instrumenata sa kojim su vršena mjerenja još prije sto godina.

Interes, zadovoljstvo i ushićenje posjetilaca najbolje će pokazati konstatacija većine: "Ovo je bogatstvo kojim se možete ponositi. Sreća da ste to sačuvali. Ovo bogatstvo treba da vide i ljudi van Bosne i Hercegovine".

Izložba je postavljena tako da posjetiocu prezentira stogodišnji razvoj i dostignuća čiji vrhunac predstavlja savremena kompjuterska tehnologija i obrada podataka.

Zaslužni pojedinci i predstavnici institucija koji su dobili povelje okupili su se i evocirali svoje životne uspomene na prigodnom ručku koji je u njihovu čast priredila Geodetska uprava općine Centar.

Zatvaranjem izložbe, 10.decembra 1996.godine završeno je i obilježavanje 110 godina katastra u Bosni i Hercegovini.